

14 OCT 1997

Najib - Muzik

MUZIK PENTING, 57 SEKOLAH SUDAH MULAI KURIKULUMNYA

KUALA LUMPUR, 14 Okt (Bernama) -- Muzik, yang merupakan sebahagian budaya, mempunyai peranan dalam mencapai matlamat falsafah pendidikan untuk melahirkan pelajar yang seimbang, kata Menteri Pendidikan, Datuk Seri Najib Tun Razak.

Katanya, muzik penting dari segi pemupukan nilai-nilai estetika, pembentukan emosi dan kreativiti selain menjadi satu pengukur ketinggian tamadun berdasarkan nilai budaya yang turut merangkumi muzik.

"Tidak patutlah jika kita merendah-rendahkan kedudukan muzik," katanya ketika berucap mewakili Perdana Menteri Datuk Seri Dr Mahathir Mohamad merasmikan Kolej Muzik Antarabangsa di sini malam ini.

Najib berkata Kementerian Pendidikan yang menyedari kepentingan muzik telahpun mula mengajar muzik di sekolah-sekolah rendah dan menengah di samping menggalakkan ia juga diajar di peringkat pra-sekolah.

Beliau berkata setakat ini pelajaran muzik telah diajar di 57 buah sekolah menengah harian dan sekolah berasrama penuh termasuk yang telahpun menubuhkan "brass band" masing-masing.

Najib berkata bagi menampung keperluan tenaga pengajar dalam bidang muzik pula, Kementerian Pendidikan menyediakan peluang kepada lulusan diploma dan sarjana bidang itu untuk menyertai latihan perguruan selama setahun bagi melayakkan mereka mengajar.

Beliau percaya dengan adanya kolej itu, yang terletak di Jalan Pahang, akan dapat membantu melahirkan lebih ramai guru dan pensyarah muzik bagi menampung keperluan di masa depan.

Kolej itu, yang memulakan pengambilan pelajarinya sejak tahun 1995, menawarkan program diploma selama tiga tahun bagi bidang pengkhususan persembahan, gubahan, sintesis muzik, produksi dan kejuruteraan muzik.

Pengerusi Lembaga kolej itu Tan Sri Murad Mohd Noor ketika berucap berkata kolej itu juga menyediakan program bersama dengan Kolej Muzik Berklee di Boston, Amerika Syarikat dan sedang merangka program empat tahun sarjana muzik (kepujian) dengan Universiti Westminster, Britain.

"Komitmen kami terhadap pendidikan formal muzik kontemporari amat nyata dengan pelaburan sebanyak RM20 juta untuk program kolej ini, kakitangan dan peralatan teknologi terkini," katanya. -- Bernama

MNY oba